



**U P U T S T V O**  
o utvrđivanju kvalifikacija i postupku imenovanja članova biračkih odbora  
(Prečišćeni tekst)

Sarajevo, april 2016. godine

Na osnovu člana 2.9 stav (1) tačka 2, člana 1.5 stav (3) i člana 2.19 Izbornog zakona Bosne i Hercegovine („Službeni glasnik BiH“, br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13 i 7/14), Centralna izborna komisija Bosne i Hercegovine je na 20. sjednici, održanoj 28.04.2016. godine, utvrdila

**U P U T S T V O**  
**o utvrđivanju kvalifikacija i postupku imenovanja članova biračkih odbora**  
**(Prečišćeni tekst)**

**POGLAVLJE I. UVOD**

**Član 1.**  
**(Primjena-član 1.5 i 2.19 Izbornog zakona BiH)**

(1) Ovim uputstvom se utvrđuju:

- a) kvalifikacije, broj članova, postupak dodjele mjesta i imenovanja članova biračkih odbora, odnosno mobilnih timova (član 2.19 stav (1) do (13) Izbornog zakona BiH),
- b) kvalifikacije, broj članova i postupak imenovanja članova biračkih odbora u diplomatsko-konzularnim predstavništvima Bosne i Hercegovine (u daljnjem tekstu: DKP BiH) (član 1.5 stav (3) i (5) Izbornog zakona BiH),
- c) postupak obuke, provjere znanja i certificiranja članova biračkih odbora, odnosno mobilnih timova (član 2.19 stav (14) i (15) Izbornog zakona BiH),

(2) Član biračkog odbora, odnosno mobilnog tima, u smislu ovog uputstva je: predsjednik, član, zamjenik predsjednika i zamjenik člana.

**POGLAVLJE II. KVALIFIKACIJE I BROJ ČLANOVA**

**Odjeljak A. Birački odbori u Bosni Hercegovini**

**Član 2.**  
**(Kvalifikacije-član 2.2 stav (1) i (4) Izbornog zakona BiH)**

(1) Pored općih uslova propisanih članom 2.2. stav (1) Izbornog zakona BiH, član biračkog odbora mora ispunjavati posebne uslove:

- a) da ima prebivalište u općini za koju se imenuje birački odbor, po mogućnosti da je upisan u izvod iz Centralnog biračkog spiska za biračko mjesto za koje se imenuje,
- b) da ima najmanje završenu srednju školu, odnosno III, IV. ili V. stepen stručne spreme i
- c) da ima certifikat izdat od izborne komisije ili Centralne izborne komisije BiH.

(2) Prilikom imenovanja člana biračkog odbora i njegovog zamjenika, izborna komisija nastojat će osigurati da imenovanje bude u skladu sa odredbom člana 2.2 stav (4) i odredbom člana 2.19 stav (11) Izbornog zakona BiH.

**Član 3.**  
**(Broj članova-član 2.19 stav (1) i (2) Izbornog zakona BiH)**

(1) Birački odbor sastoji se od predsjednika i njegovog zamjenika, i dva člana i njihovih zamjenika, ako je u izvodu iz Centralnog biračkog spiska za određeno biračko mjesto upisano do 350 birača.

(2) Birački odbor sastoji se od predsjednika i njegovog zamjenika, i četiri člana i njihovih zamjenika, ako je u izvodu iz Centralnog biračkog spiska za određeno biračko mjesto upisano više od 350 birača.

**Član 4.**  
**(Predsjednik i članovi biračkih odbora)**

(1) Predsjednik i članovi biračkog odbora za određeno biračko mjesto trebaju, u pravilu, da budu upisani u izvod iz Centralnog biračkog spiska za to biračko mjesto.

(2) Predsjedniku ili članovima biračkog odbora koji nisu upisani u izvod iz Centralnog biračkog spiska za to biračko mjesto bit će omogućeno da budu odsutni s biračkog mjesta onoliko vremena koliko im je potrebno da na biračkom mjestu gdje su upisani obave glasanje.

**Član 5.**  
**(Zamjenici predsjednika i članova biračkih odbora)**

(1) Zamjenik predsjednika, odnosno zamjenik člana biračkog odbora učestvuje u radu biračkog odbora samo ako je predsjednik, odnosno član biračkog odbora spriječen da dođe na biračko mjesto na dan održavanja izbora ili ako moraju iz opravdanih razloga napustiti biračko mjesto u toku rada na dan održavanja izbora.

(2) Zamjenik predsjednika, odnosno zamjenik člana biračkog odbora, koji nije bio angažiran na biračkom mjestu do zatvaranja biračkog mjesta, obavezno učestvuje u brojanju glasova ako je na biračkom mjestu upisano više od 500 birača.

(3) Odredbe iz stava (2) ovog člana odnose se samo na redovna biračka mjesta. Zamjenik predsjednika, odnosno zamjenik člana biračkog odbora koji učestvuje u radu biračkog odbora kod prebrojavanja glasačkih listića poslije zatvaranja biračkog mjesta ne učestvuje u donošenju odluka, osim ako ne zamjenjuje predsjednika, odnosno člana biračkog odbora koji je odsutan.

(4) Izuzetno od stava (2) ovog člana, na redovnim biračkim mjestima u Brčko Distriktu BiH zamjenik predsjednika, odnosno zamjenik člana biračkog odbora obavezno učestvuje u brojanju glasova, bez obzira na broj birača koji su upisani u izvod iz Centralnog biračkog spiska za to biračko mjesto.

**Odjeljak B. Birački odbori u DKP-ima BiH**

**Član 6.**  
**(Kvalifikacije-član 2.2 stav (1) i (4) Izbornog zakona BiH)**

(1) Pored općih uslova propisanih članom 2.2. stav (1) Izbornog zakona BiH, član biračkog odbora u DKP-ima BiH mora ispunjavati posebne uslove:

a) da je upisan u izvod iz Centralnog biračkog spiska za birače koji glasaju izvan BiH u DKP-ima BiH ili poštom.

- b) da ima najmanje završenu srednju školu, a izuzetno da ima nižu stručnu spremu od propisane, u cilju ispunjenja uslova iz člana 1.5 stav (5) Izbornog zakona BiH.

(2) U biračkom odboru obavezno se osigurava zastupljenost članova iz svakog konstitutivnog naroda.

#### **Član 7.**

##### **(Broj članova-član 2.19 stav (1) i (2) Izbornog zakona BiH)**

(1) Birački odbor sastoji se od predsjednika i njegovog zamjenika, i dva člana i njihovih zamjenika, ako je u izvodu iz Centralnog biračkog spiska za birače koji glasaju izvan BiH, za glasanje u DKP-u BiH koji je određen za glasanje, upisano do 300 birača.

(2) Birački odbor sastoji se od predsjednika i njegovog zamjenika, i četiri člana i njihovih zamjenika, ako je u izvodu iz Centralnog biračkog spiska za birače koji glasaju izvan BiH, za glasanje u DKP-u BiH koji je određen za glasanje, upisano više od 300 birača.

### **Odjeljak C. Mobilni timovi**

#### **Član 8.**

##### **(Kvalifikacije-član 2.2 stav (1) i (4) Izbornog zakona BiH)**

(1) Pored općih uslova propisanih članom 2.2. stav (1) Izbornog zakona BiH, član mobilnog tima mora ispunjavati posebne uslove:

- a) da ima prebivalište u općini za koju se imenuje mobilni tim, i
- b) da ima najmanje završenu srednju školu, odnosno III, IV. ili V. stepen stručne spreme.

(2) Prilikom imenovanja članova mobilnih timova i njihovih zamjenika, izborna komisija nastojat će osigurati da imenovanje bude u skladu sa odredbom člana 2.2 stav (4) i odredbom člana 2.19 stav (11) Izbornog zakona BiH.

#### **Član 9.**

##### **(Broj članova-član 2.19 stav (1) i (2) Izbornog zakona BiH)**

(1) Mobilni tim sastoji se od predsjednika i njegovog zamjenika, i dva člana i njihovih zamjenika.

(2) Broj mobilnih timova utvrđuje izborna komisija rukovodeći se ukupnim brojem i prostornom raspoređenošću birača koji će glasati posredstvom mobilnog tima.

## **POGLAVLJE III. PRIJEDLOZI, POSTUPAK DODJELE MJESTA I IMENOVANJA**

### **Odjeljak A. Birački odbori u Bosni Hercegovini**

#### **Član 10.**

##### **(Prijedlozi i imenovanja - član 2.19 Izbornog zakona BiH)**

(1) U biračkim odborima zastupljeni su predstavnici političkih subjekata koji su ovjereni za učešće na izborima u izbornoj jedinici u kojoj se imenuju birački odbori, primjenjujući sistem žrijebanja koji je provela Centralna izborna komisija BiH za pozicije na glasačkom listiću.

(2) Centralna izborna komisija BiH dostavlja svim izbornim komisijama listu političkih subjekata koji su ovjereni za učestvovanje na izborima u tim izbornim jedinicama. Na listi se ne nalaze koalicije koje čine političke stranke koje u toj izbornoj jedinici imaju kandidate i kandidatske liste i samostalno učestvuju u žrijebanju.

(3) U istom biračkom odboru na istom biračkom mjestu ne može biti zastupljen politički subjekt s više od jednog predstavnika.

(4) Izborna komisija obavezna je blagovremeno uputiti poziv svim političkim subjektima iz stava (2) ovog člana, ovjerenim za učešće na izborima u izbornoj jedinici za koju se imenuje birački odbor, da prisustvuju dodjeli mjesta u biračkom odboru, koje će obaviti izborna komisija najkasnije 60 dana prije dana održavanja izbora. Političkom subjektu koji nije bio prisutan postupku dodjele mjesta u biračkom odboru izborna komisija dužna je dostaviti rezultate po okončanom postupku dodjele odmah, a najkasnije u roku od dva dana.

(5) Prijedlog za članove biračkih odbora politički subjekti podnose u skladu s odredbom člana 2.19 stav (10) Izbornog zakona BiH i odredbama ovog uputstva, vodeći računa da predloženi kandidati budu upisani u izvod iz Centralnog biračkog spiska za to biračko mjesto i da su fizički sposobni za obavljanje poslova u biračkom odboru.

(6) Politički subjekti obavezni su, prilikom dostavljanja prijedloga za članove biračkih odbora, izbornoj komisiji dostaviti obrasce SG-1 - izjava predloženog člana biračkog odbora/mobilnog tima, svojeručno potpisane od predloženih kandidata za članove biračkih odbora i ovjerene pečatom i potpisom ovlaštenog lica političkog subjekta. Obrazac SG-1 je sastavni dio ovog uputstva.

(7) Politički subjekt će, ako to izborna komisija zatraži, dostaviti dokaze o kvalifikaciji i ispunjavanju uslova predloženih kandidata za članove biračkih odbora, odnosno mobilnih timova.

(8) Ako politički subjekt ne dostavi obrazac iz stava (6), odnosno podatke iz stava (7) ovog člana, izborna komisija takav prijedlog za imenovanje člana biračkog odbora/mobilnog tima neće razmatrati.

(9) Nakon završenog perioda za dostavljanje prijedloga političkih subjekata izborna komisija pristupa imenovanju članova biračkih odbora. Prilikom imenovanja članova biračkih odbora izborna komisija vodit će računa o izrečenim sankcijama zabrane angažiranja za rad na biračkom mjestu.

(10) Mjesta zamjenika članova biračkih odbora popunjavaju se iz istih političkih subjekata koji su žrijebanjem određeni za popunjavanje članstva za dato biračko mjesto.

(11) Izborna komisija imenuje predsjednike biračkih odbora i njihove zamjenike iz reda članova, odnosno zamjenika članova biračkih odbora, vodeći računa o zastupljenosti političkih subjekata i njihovom dosadašnjem izbornom iskustvu.

(12) Izborne komisije obavezne su političkim subjektima dostaviti akt o imenovanju članova biračkih odbora. Ovaj akt treba da sadrži: ime i prezime predsjednika i zamjenika predsjednika biračkih odbora, članova biračkih odbora i njihovih zamjenika, pol, naziv političkog subjekta na čiji prijedlog su imenovani, broj i lokaciju biračkog mjesta, obrazloženje na koji način je izvršeno imenovanje i pouku o pravnom lijeku. Akt o imenovanju članova biračkih odbora izborne komisije, na zahtjev, dostavljaju i Centralnoj izbornoj komisiji BiH.

(13) Na odluku izborne komisije o imenovanju predsjednika, članova biračkih odbora i njihovih zamjenika može se uložiti prigovor izbornoj komisiji u roku od 24 sata od prijema odluke o imenovanju biračkih odbora.

### **Član 11.** **(Postupak dodjele mjesta u biračkim odborima)**

(1) Postupak dodjele mjesta u biračkim odborima obavlja se na sljedeći način:

a) Političke stranke koje samostalno imaju ovjerenu kandidatsku listu, nezavisni kandidati i koalicije koje u svom sastavu nemaju političke stranke koje samostalno imaju ovjerenu kandidatsku listu ili kandidata za bilo koji nivo vlasti u osnovnoj izbornoj jedinici, ravnopravno učestvuju u dodjeli mjesta u biračkim odborima, odnosno zastupljene su u svakom krugu dodjele mjesta u biračkim odborima.

b) Koalicije koje čine i političke stranke koje samostalno imaju ovjerenu kandidatsku listu i političke stranke koje nemaju samostalnog kandidata ili kandidatsku listu na glasačkom listiću u osnovnoj izbornoj jedinici, učestvuju u dodjeli mjesta u biračkim odborima u onom omjeru u kojem su političke stranke koje nemaju samostalnog kandidata ili kandidatsku listu na glasačkom listiću, zastupljene u koaliciji.

c) Navedeni kriterij primjenjuje se tako što su koalicije u kojim su političke stranke koje nemaju samostalnog kandidata ili kandidatsku listu na glasačkom listiću, zastupljene u omjeru 1/2, izostavljene u svakom drugom krugu dodjele mjesta u biračkim odborima, odnosno zastupljene u omjeru 2/3, izostavljene u svakom trećem krugu dodjele mjesta u biračkim odborima, odnosno zastupljene u omjeru 1/3, izostavljene u svakom drugom i trećem krugu dodjele mjesta u biračkim odborima itd.

d) Popunjavanje mjesta u biračkim odborima vrši se na način da se odabere prvo biračko mjesto s liste biračkih mjesta. Zatim se članstvo u biračkom odboru za to biračko mjesto popunjava nazivima političkih subjekata, pridržavajući se žrijebom utvrđenog redoslijeda, dok se ne popuni ukupno članstvo tog biračkog odbora. Nakon toga bira se sljedeće biračko mjesto sa liste biračkih mjesta, a članstvo u biračkom odboru popunjava se narednim političkim subjektima sa liste političkih subjekata. Postupak se ponavlja za svako biračko mjesto, do konačnog popunjavanja svih mjesta u biračkim odborima.

e) Ukoliko broj ovjerenih političkih subjekata prelazi ukupan broj mjesta u biračkim odborima u datoj općini, izborna komisija popunjava mjesta po redoslijedu žrijebanja dok ne popuni sva mjesta u biračkim odborima. Politički subjekti koji su preostali ne učestvuju u raspodjeli mjesta u biračkom odboru.

f) Stranke koje su članice koalicije i njihova koalicija ne mogu dobiti mjesta u istom biračkom odboru. U tom slučaju, izborna komisija vrši zamjenu mjesta tako što političku stranku ili koaliciju premješta u naredni birački odbor, gdje je takva zamjena moguća, a da se ne naruše naprijed navedeni kriteriji. U slučaju da zamjena nije moguća, politička stranka ili koalicija gube mjesto u biračkom odboru, a popunu tog mjesta vrši izborna komisija iz evidencije kvalificiranih članova ranijih biračkih odbora koje posjeduje.

(2) Centralna izborna komisija BiH će nakon ovjere političkih subjekata donijeti posebnu instrukciju za primjenu ovog člana.

## **Odjeljak B. Birački odbori u DKP-ima BiH**

### **Član 12.**

#### **(Prijedlozi i imenovanje-član 1.5 stav (3) Izbornog zakona BiH)**

(1) Centralna izborna komisija BiH, najkasnije u roku od 50 dana prije dana održavanja izbora, upućuje zahtjev Ministarstvu vanjskih poslova Bosne i Hercegovine (u daljnjem tekstu: Ministarstvo vanjskih poslova BiH) da dostavi prijedlog članova biračkih odbora u DKP-ima BiH koji su određeni za biračko mjesto za glasanje državljana Bosne i Hercegovine koji su se prijavili da glasaju lično u DKP-ima BiH.

(2) Centralna izborna komisija BiH, uz zahtjev iz stava (1) ovog člana, dostavlja Ministarstvu vanjskih poslova BiH i odluku o DKP-ima BiH koji su određeni za glasanje.

(3) Ministarstvo vanjskih poslova BiH, najkasnije u roku od 10 dana od dana prijema zahtjeva iz stava (1) ovog člana, dostavlja Centralnoj izbornoj komisiji BiH prijedlog za članove biračkih odbora i njihove zamjenike u DKP-ima BiH, na obrascu SG-2 - izjava predloženog člana biračkog odbora u DKP-u BiH, vodeći računa da predloženi kandidati ispunjavaju uslove propisane članom 6. ovog uputstva. Obrazac SG-2 - izjava predloženog člana biračkog odbora u DKP-u BiH je sastavni dio ovog uputstva.

(4) Centralna izborna komisija BiH imenuje članove biračkih odbora i njihove zamjenike po dostavljenom prijedlogu, najkasnije u roku od 30 dana prije dana održavanja izbora.

(5) Ukoliko Ministarstvo vanjskih poslova BiH ne dostavi prijedloge za imenovanje biračkih odbora u određenim DKP-ima BiH, Centralna izborna komisija BiH će izvršiti imenovanje biračkih odbora u skladu sa svojim nadležnostima.

### **Član 13.**

#### **(Zamjenici članova biračkih odbora)**

(1) Zamjenik predsjednika, odnosno zamjenici članova biračkog odbora učestvuju u radu biračkog odbora samo ako je predsjednik, odnosno član biračkog odbora spriječen da dođe na biračko mjesto na dan održavanja izbora ili ako moraju iz opravdanih razloga napustiti biračko mjesto u toku rada na dan održavanja izbora.

(2) Zamjenik predsjednika, odnosno zamjenici članova biračkog odbora u slučaju iz stava (1) ovog člana učestvuju u procesu donošenja odluka.

## **Odjeljak C. Mobilni timovi**

### **Član 14.**

#### **(Prijedlozi, dodjela mjesta i imenovanje-član 1.5 stav (3) Izbornog zakona BiH)**

(1) Na postupak dodjele mjesta i imenovanja mobilnih timova primjenjuju se odredbe člana 10. i člana 11. ovog uputstva.

(2) Popunjavanje mjesta u mobilnim timovima nastavlja se od političkog subjekta kojem je posljednjem dodijeljeno mjesto u biračkom odboru.

(3) Nakon okončanog postupka utvrđivanja mjesta u mobilnim timovima, izborna komisija će političkim subjektima koji su dobili mjesto u mobilnom timu, najkasnije u roku od 15 dana prije održavanja izbora, uputiti zahtjev za dostavljanje prijedloga za članove mobilnih timova i njihove zamjenike.

(4) Politički subjekti iz stava (3) ovog člana dužni su izbornoj komisiji dostaviti svoje prijedloge za članove mobilnih timova i njihove zamjenike najkasnije u roku od tri dana od dana prijema zahtjeva.

(5) Politički subjekti podnose prijedlog za članove mobilnih timova u skladu sa odredbama Izbornog zakona BiH i ovog uputstva, vodeći računa da predloženi kandidati budu fizički sposobni za obavljanje poslova u mobilnom timu.

(6) Izborne komisije imenuju članove mobilnih timova najkasnije u roku od 10 dana prije dana održavanja izbora.

#### **POGLAVLJE IV. OBUKA, PROVJERA ZNANJA, METODE I KRITERIJI PROVJERE ZNANJA I CERTIFICIRANJE**

##### **Član 15.**

##### **(Obuka-član 2.19 stav (14) Izbornog zakona BiH)**

(1) U skladu s planom i programom edukacije, Centralna izborna komisija BiH organizirat će obuku predsjednika i članova biračkih odbora u DKP-ima BiH, kao i njihovih zamjenika, o načinu glasanja i brojanju koverti s glasačkim listićima.

(2) U skladu s planom i programom edukacije koji donosi Centralna izborna komisija BiH, izborne komisije organizirat će obuku predsjednika i članova biračkih odbora, kao i njihovih zamjenika, te predsjednika i članova mobilnih timova, kao i njihovih zamjenika, o načinu glasanja, brojanja glasova i brojanju koverti s glasačkim listićima.

(3) Ako član biračkog odbora, odnosno mobilnog tima ne prisustvuje obuci iz st. (1) i (2) ovog člana, bit će razriješen dužnosti i na njegovo mjesto će izborna komisija imenovati člana iz evidencije kvalificiranih članova ranijih biračkih odbora, odnosno mobilnih timova koju posjeduje.

##### **Član 16.**

##### **(Provjera znanja i certificiranje)**

(1) Nakon provedene obuke Centralna izborna komisija BiH će, prema metodologiji koju utvrdi, izvršiti provjeru znanja i uspješnim predsjednicima i članovima biračkih odbora i njihovim zamjenicima u DKP-ima BiH dodijeliti certifikate.

(2) Nakon provedene obuke, izborna komisija izvršit će provjeru znanja i uspješnim predsjednicima biračkih odbora, odnosno mobilnih timova i njihovim zamjenicima dodijeliti certifikate.

(3) Predsjednici i zamjenici predsjednika biračkih odbora, odnosno mobilnih timova koji su dobili certifikat dužni su učestvovati u obuci članova biračkih odbora, odnosno mobilnih timova koje organizira općinska izborna komisija, na način da:

- a) pomažu izbornoj komisiji u provođenju praktičnog dijela obuke i vježbe članova biračkih odbora, odnosno mobilnih timova i njihovih zamjenika,
- b) organiziraju obuku članova biračkih odbora, odnosno mobilnih timova i njihovih zamjenika u biračkom odboru/mobilnom timu u kojem su imenovani za predsjednika, odnosno zamjenika predsjednika, u posebnom dopunskom terminu.

(4) Izborna komisija će, nakon izvršene provjere znanja, uspješnim članovima biračkih odbora, odnosno mobilnih timova i njihovim zamjenicima također dodijeliti certifikate. Certifikat predstavlja dokaz da je član biračkog odbora prošao obaveznu edukaciju za date izbore.

(5) Izgled certifikata iz st. (1), (2) i (4) ovog člana utvrđuje Centralna izborna komisija BiH i sastavni su dio ovog uputstva.

(6) Izborna komisija vodi evidenciju izdatih certifikata, a ona sadrži ime i prezime te jedinstveni matični broj lica kojem je uručen certifikat i serijski broj certifikata.

(7) Izdati certifikati važeći su samo za izborni ciklus za koji se izdaju.

### **Član 17.**

#### **(Metode i kriteriji za provjeru znanja)**

(1) Centralna izborna komisija BiH utvrđuje metode i kriterije za provjeru znanja imenovanih predsjednika i članova biračkih odbora, odnosno mobilnih timova, kao i njihovih zamjenika.

(2) Provjera znanja za učesnike iz stava (1) ovog vrši se pismenim testiranjem ili putem on-line testiranja, uz primjenu metode ponuđenih višestrukih odgovora.

(3) Testiranjem će biti obuhvaćena pitanja iz oblasti poznavanja načina glasanja, brojanja glasačkih listića, pakovanja izbornog materijala i drugo, koja su podijeljena u tri različita uzorka testa. Izborna komisija će svakom kandidatu koji pristupa testiranju dati jedan uzorak testa, vodeći računa da kandidati koji na testiranju sjede u neposrednoj blizini dobiju različite uzorke testa. Testiranje traje 30 minuta.

(4) Izborna komisija će prije početka testiranja primjerke testova ovjeriti pečatom izborne komisije, a nakon provedenog testiranja i provjere uspješnosti kandidata i potpisom predsjednika, odnosno člana izborne komisije.

(5) Uspješnim će se smatrati oni kandidati koji prilikom testiranja ponude 50% ili više od 50% tačnih odgovora.

(6) Kandidati koji prilikom testiranja ponude 75% ili više tačnih odgovora smatrat će se naročito uspješnim.

(7) Kandidati koji ne budu uspješni na testiranju bit će razriješeni dužnosti i na njihovo mjesto izborna komisija imenovat će članove iz evidencije članova biračkih odbora, odnosno mobilnih timova koju posjeduje.

(8) Izborna komisija provodit će postupak obuke i provjere znanja iz čl. 17. i 18. ovog uputstva, sve dok u biračke odbore ne budu imenovani kandidati koji su sa uspjehom prošli testiranje.

(9) Izborne komisije dužne su popunjene testove čuvati pohranjene u svojoj arhivi. Izborne komisije će, ako to zatraži Centralna izborna komisija BiH, dostaviti na uvid popunjene testove imenovanih predsjednika i članova biračkih odbora, odnosno mobilnih timova, njihovih zamjenika, kao i drugih kandidata koji su pristupali testiranju.

(10) Centralna izborna komisija BiH za svake izbore utvrđuje testove za testiranje članova biračkih odbora i dostavlja ih izornoj komisiji radi provođenja testiranja.

**„POGLAVLJE V. BIRAČKI ODBORI I TIMOVI ZA BROJANJE KOJI SE ANGAŽUJU ZA BROJANJE GLASAČKIH LISTIĆA U CILJU OBJEDINJAVANJA UTVRĐENIH REZULTATA GLASANJA**

**Član 18.**

**(Imenovanje biračkog odbora ili posebnih timova nakon utvrđenih izbornih rezultata na biračkom mjestu)**

(1) Ukoliko Centralna izborna komisija BiH, na zahtjev izborne komisije osnovne izborne jedinice u BiH, donese odluku da se za određeno biračko mjesto izvrši brojanje glasačkih listića u cilju objedinjavanja utvrđenih rezultata glasanja, za jedan ili više izbornih nivoa za koje se provode izbori, izborna komisija osnovne izborne jedinice u BiH će posebnom odlukom angažovati:

- a) isti birački odbor koji je radio na biračkom mjestu za koje se vrši brojanje glasačkih listića u cilju objedinjavanja utvrđenih rezultata glasanja, ukoliko izborna komisija utvrdi da je do nepravilnosti u brojanju došlo bez namjere da se utvrđeni rezultati glasanja lažno prikažu ili
- b) birački odbor koji će biti formiran od članova biračkih odbora koji su radili na drugim biračkim mjestima na kojima je brojanje glasačkih listića i utvrđivanje rezultata glasanja obavljeno bez nepravilnosti, pridržavajući se pri tom zastupljenosti političkih subjekata kojima su pripale pozicije na biračkom mjestu za koje se vrši brojanje glasačkih listića u cilju objedinjavanja utvrđenih rezultata glasanja ili
- c) posebno formirane timove za brojanje koji se imenuju iz evidencije izborne komisije, a čiji članovi ispunjavaju uslove utvrđene ovim uputstvom. Timove za brojanje izborna komisija angažuje ukoliko nije u mogućnosti angažovati biračke odbore iz tačke a) ili tačke b) ovog člana.

(2) Članovi biračkih odbora iz tačke b) i članovi timova za brojanje iz tačke c) ovog člana, imaju pravo na dodatnu naknadu za svoj rad, a koja ne može biti manja od naknade utvrđene za zamjenike članova biračkih odbora iz člana 5. tačka (2) ovog uputstva.“

**Član 19.**

**(Propisi obuhvaćeni ovim uputstvom)**

Ovo uputstvo obuhvata Uputstvo o utvrđivanju kvalifikacija i postupku imenovanja članova biračkih odbora („Službeni glasnik BiH“, broj 37/14 i Uputstvo o dopunama Uputstva o utvrđivanju kvalifikacija i postupku imenovanja članova biračkih odbora broj: 05-1-02-2-493-1/16 od 28.04.2016. godine.

**Član 20.**

**(Objavljivanje u službenim glasilima)**

Ovo uputstvo bit će objavljeno u „Službenom glasniku BiH“, „Službenim novinama Federacije BiH“, „Službenom glasniku RS“, „Službenom glasniku Brčko distrikta BiH“ i web-stranici Centralne izborne komisije BiH [www.izbori.ba](http://www.izbori.ba).

Broj: 05-1-02-2-493-2/16  
Sarajevo, 28.04.2016. godine



Predsjednik  
*Dr. Ahmet Šantić*  
Dr. Ahmet Šantić

Na osnovu člana 2.2, 2.3 i 2.19 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13 i 7/14), člana 10. i 15. Uputstva o utvrđivanju kvalifikacija i postupku imenovanja članova biračkih odbora i člana 173. Zakona o upravnom postupku ("Službeni glasnik BiH", br. 29/02, 12/04, 88/07, 93/09 i 41/13), pod punom materijalnom i krivičnom odgovornošću predloženi član biračkog odbora, odnosno mobilnog tima, daje

### IZJAVU

<b>OSNOVNA IZBORNA JEDINICA</b>	
<hr style="border: 0; border-top: 1px solid black; margin-bottom: 5px;"/> <b>Naziv političkog subjekta koji dostavlja prijedlog</b> <hr style="border: 0; border-top: 1px solid black; margin-top: 5px;"/>	
Ime i prezime predloženog člana biračkog odbora/mobilnog tima	
Stručna sprema predloženog člana biračkog odbora/mobilnog tima	
Zanimanje predloženog člana biračkog odbora/mobilnog tima	
JMB i broj lične karte predloženog člana biračkog odbora/mobilnog tima	
Tačna adresa stanovanja predloženog člana biračkog odbora/mobilnog tima	
Broj telefona predloženog člana biračkog odbora/mobilnog tima	

Ja, \_\_\_\_\_, izjavljujem, kao lice koje je predloženo za člana (Ime i prezime predloženog člana biračkog odbora/mobilnog tima) biračkog odbora, odnosno mobilnog tima da nemam smetnji iz člana 2.3 stav (1) Izbornog zakona BiH, da su svi podaci koji su navedeni u ovom obrascu tačni, da sam saglasan da na prijedlog navedenog političkog subjekta budem predložen za člana biračkog odbora, odnosno mobilnog tima, na izborima koji će biti održani dana \_\_\_\_\_, da sam saglasan da prisustvujem obaveznoj obuci i provjeri znanja o načinu glasanja i brojanja glasova koju organizira izborna komisija, a u skladu s planom i programom edukacije koji donosi Centralna izborna komisija BiH i Uputstvom o utvrđivanju kvalifikacija i postupku imenovanja članova biračkih odbora.

Datum: \_\_\_\_\_

\_\_\_\_\_  
 (Potpis predloženog člana biračkog odbora  
 koji odgovara potpisu na identifikacionom dokumentu)

M.P. \_\_\_\_\_  
 (Potpis ovlaštenog lica političkog subjekta)

**OBRAZAC: SG-1**

**PRIJEDLOG**  
**ZA ČLANA/ZAMJENIKA ČLANA BIRAČKOG ODBORA U DKP-u BIH**

**DRŽAVA** \_\_\_\_\_

**Šifra biračkog mjesta u DKP – u** \_\_\_\_\_

(međunarodna slovna oznaka države u kojoj se nalazi DKP i redni broj biračkog mjesta)

---

**PODACI O PREDLOŽENOM ČLANU/ZAMJENIKU ČLANA**  
**BIRAČKOG ODBORA U DKP-u BIH**

---

Ime i prezime:

JMB:

Boravište:

Vrsta i broj identifikacionog dokumenta:

Pol:

Predloženi član/zamjenik člana biračkog odbora izjašnjava se kao pripadnik  
\_\_\_\_\_ naroda.

Stepen stručne spreme:      SSS    VŠS    VSS                      (Zaokružiti odgovarajući odgovor)

Zanimanje:

Trenutno zaposlenje:

Obavlja poslove:

Podaci o izbornom iskustvu:

Predloženi član/zamjenik člana biračkog odbora nije član najvišeg izvršnog organa niti jedne  
političke partije ili koalicije:                      DA              NE                      (Zaokružiti odgovarajući odgovor)

*Predložena pozicija u biračkom odboru:*

---

Datum: \_\_\_/\_\_\_/\_\_\_\_\_.g.      M.P.

\_\_\_\_\_  
Potpis predloženog člana/zamjenika člana biračkog odbora

\_\_\_\_\_  
Potpis nadležnog lica Ministarstva vanjskih poslova BiH

**OBRAZAC: SG-2**

Na osnovu člana 2.19 stav (14) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13 i 7/14) i člana 15, 16 i 17. Uputstva o utvrđivanju kvalifikacija i postupku imenovanja članova biračkih odbora ("Službeni glasnik BiH" broj: \_\_\_\_), izdaje se

## *C E R T I F I K A T*

Ovim certifikatom potvrđuje se da je \_\_\_\_\_, JMBB \_\_\_\_\_ iz \_\_\_\_\_, prisustvovao/la obuci koja se organizira za članove biračkih odbora, odnosno mobilnih timova u Bosni i Hercegovini, u skladu s planom i programom edukacije koji donosi Centralna izborna komisija BiH za provođenje izbora koji se održavaju \_\_\_\_\_ godine i da je sa uspjehom prošao/la provjeru znanja.

Certifikat izdaje:

Izborna komisija osnovne izborne jedinice \_\_\_\_\_

Datum: \_\_\_\_\_

M.P. \_\_\_\_\_

Serijski broj: \_\_\_\_\_

Predsjednik/član izborne komisije

Obrazac: BOC-1



Na osnovu člana 2.19 stav (14) i člana 1.5 stav (3) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13 i 7/14) i člana 15. 16. i 17. Uputstva o utvrđivanju kvalifikacija i postupku imenovanja članova biračkih odbora ("Službeni glasnik BiH" broj: \_\_\_\_), izdaje se

## C E R T I F I K A T

*o uspješno završenoj obuci za predsjednika i članove biračkih odbora za glasanje u diplomatsko-konzularnim predstavništvima Bosne i Hercegovine*

Potvrđuje se da je \_\_\_\_\_,  
( Ime, ime roditelja i prezime )

JMB \_\_\_\_\_ iz \_\_\_\_\_,

prisustvovao/la obuci koja se organizira za članove biračkih odbora u diplomatsko-konzularnim predstavništvima Bosne i Hercegovine, u skladu s planom i programom edukacije koji donosi Centralna izborna komisija BiH za provođenje izbora koji se održavaju \_\_\_\_\_ godine i da je *sa uspjehom* završio/la obuku za predsjednika i članove biračkih odbora za glasanje u diplomatsko-konzularnim predstavništvima Bosne i Hercegovine.

Datum: \_\_\_\_\_

M.P.

Serijski broj: \_\_\_\_\_

\_\_\_\_\_  
Predsjednik/član  
Centralne izborne komisije BiH

Na osnovu člana 2.19 stav (14) Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13 i 7/14) i člana 15, 16 i 17. Uputstva o utvrđivanju kvalifikacija i postupku imenovanja članova biračkih odbora ("Službeni glasnik BiH" broj: \_\_\_\_), izdaje se

## *C E R T I F I K A T*

Ovim certifikatom potvrđuje se da je \_\_\_\_\_, JMBB \_\_\_\_\_ iz \_\_\_\_\_, prisustvovao/la obuci koja se organizira za članove biračkih odbora, odnosno mobilnih timova u Bosni i Hercegovini, u skladu s planom i programom edukacije koji donosi Centralna izborna komisija BiH za provođenje izbora koji se održavaju \_\_\_\_\_ godine i da je sa uspjehom prošao/la provjeru znanja.

Certifikat izdaje:

Centralna izborna komisija BiH

Datum: \_\_\_\_\_

M.P. \_\_\_\_\_

Serijski broj: \_\_\_\_\_

Predsjednik/član

Centralne izborne komisije BiH

Obrazac: BOC-3